

Ningun hende ta corda riba "Benefactor di Aruba"

Si mi bisa cu ningun hende ta corda riba "Benefactor di Aruba", esey ta kizas pa motibo cu ningun hende no sa cu "Aruba tabata tin su Benefactor".

Pa decenas di aña nos a tende di Dr. Fulgencio da Costa Gomez, di Juancho Irausquin, di Henny y Shon A Eman, di Libertador Betico Croes, di Tula, Karpata, Toussaint L'Ouverture, ultimo aña ta masha "in" e nomber di Alonso de Hojeda --cu a cumenza caba hostilmente cu nos indiannan-- di Piet Hein, Peter Stuyvesant, Van Waalbeeck, y tur nombernan hulandes, asocia cu nos cayanan.

Pero ningun hende ta menciona nomber di "Juan de Ampies", e homber cu danki na dje, Aruba tin su Arubianonan, cu Arubianonan por bati riba nan pecho di nan descendencia indian. (aunke nan por a tende e nomber mencina of lesa of siña algo masha cortico di dje for di bukinan hulandes)

E homber cu danki na dje, e armadanan di indieronan no a saca delaster un indian for di Aruba pa bay traha den minanan na Española.

E homber cu a trece back e indiannan di Aruba cu tabata na Española, y cu a duna nan tur proteccion y tabata stima e indiannan di Aruba cu na nan turno tabata stima Juan de Ampies.

Si lesa historia di Juan de Ampies, kizas lo por bisa manera mi opinion ta: "Esey ta e homber cu mester di un statua grandi poni riba nos isla"

Y aki mi ta bay back riba e comentario encuanto Historia y trabao di historiadornan.

E buki mas completo skirbi (na Papiamentu) riba nos historia for di 1499, te esun "Historia di Aruba" di Aruba di Sr. Jossy Mansur.

Esnan cu lesa e buki ey bon, y sigui e parti riba historia di Juan de Ampies, lo por tin e mes idea o opinion cu mi.

E datonan aki entre otro ta saca for di: Carta di Juan de Ampies, publica den Oviedo y Baños, edicion di Fernandez Duro tomo 2, pagina 210; Arellano Moreno; Reales Cédulas Relativas a Venezuela 1500-1550; Carta di Juan de Ampies na Emperador Carlos V, C.D.I. prome serie, Tomo 1 pagina 443 en adelante; Cardot, Carlos Felice: Curazao hispanico, Caracas, 1973 pag 13 y asina por sigui menciona mas di cien referencia mas.

AMPIES, PROTECTOR DI INDIANNAN DI ARUBA

Tur e referencianan riba e historia di Juan de Ampies, manera menciona aki riba, y publica den e buki "Historia di Aruba", ta muestra e grandi cu Juan de Ampies tabata pa Aruba. Pademan Jeronimo den nan scrituranan a muestra cu e tabata goza di fama di bon hende. A muestra tambe di e bon trato cu e tabata duna indiannan di Aruba na Española, y cu e tabata considera e indiannan di Aruba ademas di ta masha inteligente. "Historia di Aruba" di Sr. Jossy Mansur a indica tambe cu ta precisamente cu Juan de Ampies, Factor na Española, e historia di Aruba ta cumenza propiamente den analnan historico di e conquista di continente americano.

E tabata testigo (radica na Santo Domingo) di e trato hostil cu e Armadanan di Indiero tabata causando riba e isla di Aruba y su bisiñanan. El a skirbi carta largo na rey di Spaña encuanto loke tabata pasando cu e indiannan aki.

El a dirigi su mes na Padernan Jeronimo cu tabata gobernando Española y a obtene un mandamento den cual a ser ordena cu ningun Armada por toca puertonan di Aruba, Bonaire of Curacao pa captura

indian, bao di riesgo grave di sufri castigonan pisa.

Despues di gobernacion di Jeronimonan, Licenciado Rodrigo de Figueroa a goberna Española y Juan de Ampies a haya un ordo similar di dje den cual ta specifica cu tabata prohibi di busca indiannan for di Aruba y otro islanan bisiña, ni pa trata nan como catibo o causa nan maltrato di ningun sorto.

E Indieronan a sigui captura indiannan te cu Juan de Ampies a tende di esaki y a protesta fuertemente cera Rodrigo de Figueroa kende a encarga Juan de Ampies pa resolve problemanan di e indiannan y cuida e indiannan cu e tabata stima asina tanto. Ampies a haya e islanan bao di su proteccion y a haya libertad pa hiba e indiannan di Aruba back pa e isla, locual el a haci tambe pa repoblamento di e isla nan aki.

Fama di Juan de Ampies a plama y hasta na Costa Firme (Venezuela) e Cacique Manaure na Paraguana a haya admiracion pe, pa medio di su agente Gonzalo de Sevilla cu a topa tambe cu Cacique Baltazar. Sevilla a cay den un emboscada di un barco indiero y ta despues cu Ampies a tende esaki y cu e armadanan ta boycoteando su tarea di pacificacion, a rabia masha hopi y a exige y haya libertad di tur e indiannan.

For di rey di Spaña cu tabata conoce su labornan, el a ricibi un Real Cedula fecha 24 di november 1525 hayando consentimiento pa pobla e islanan y 15 di november 1526, posesion legal y juridico di Aruba y su bisiñanan, segun por lesa den e buki di Jossy Mansur haciendo referencia na e documentonan y scrituranan riba tur esaki.

Den e mes Cedula ey e Rey a duna Ampies posesion pleno di Aruba y tur poder pa comercia cu e Cacique di tera Firme y prohibi na mes momento tur armada y tur otro hende di captura indiannan sin su permiso bao di pena di morto o di perde tur nan propiedadnan.

Ampies a cumenza manda tur indian di Aruba back, varios grupo spaño cu a acompaña nan, cu bestianan di cria, manera cabay, cabrito, porco, baca y varios mas.

E indiannan cu a bay como colono el a duna encargo di cristianizacion di e indiannan.

Na dos ocasion e tabata riba Aruba cu el a goberna mayor tempo for di un distancia y semper representa pa un agente.

Juan de Ampies a tira su sombra protector riba indiannan di Aruba y semper a intercede na autoridadnan mas halto na favor di indiannan di Aruba y tur cu a conoce y skirbi di dje, a mencione como e "Benefactor di Aruba".

Danki na dje, Aruba a keda pobla despues di 1500, y despues di su morto 15 di februari 1533, a pesar cu indieronan a sigui probecha di captura indiannan, hopi indian a sconde den cuebanan y otro lugarnan di sconde riba nos isla.

Tabata danki na Juan de Ampies y su proteccion di nos indiannan, awe nos por papia y bisa cu nos ta descendientenan di indian (cu a wordo protegi y defende pa Juan de Ampies), locual por a saca afo claramente lesando e publicacion di "Historia di Aruba" di Sr. Jossy Mansur y basa riba e documentacion cu el a studia pa esaki.

Aki atrobe mi ta menciona cu no ta publica asuntonan historico sin cu bo a studia y investiga esaki, pa djies menciona e palabra "historia" y ta ora cu tin e referencianan riba documentacionnan, bo historia ta haya credibilidad.

No manera tin hende ta haci riba nos isla di cohe cos di otro hende, usa nan nomber bao di dje y bisa: "ta di mi e ta".

Juby.